

**Inuiaqatigiinni ataqatigiinnerup pilersinneqaqqinnissaa qanoq ililluni
kulakkeerneqarsinnaanera pillugu oqallinnissamik siunnersuut.**
(Inatsisartunut ilaasortaq Knud Fleischer, Kattusseqatigiit Partiiat)

Akissuteqaat

(Naalakkersuisut siulittaasuut)

Naalakkersuisut sinnerlugit aallarniutigalugu Inatsisartuni ilaasortaq Knud Fleischer oqallinnissamik soqutiginartumik aallartitsisoqarnissaanik saqqummiimmat qujaffigissavara. Ulluni naalakkersuinertervik oqaluuserisassat akuttunngitsumik teknikkiuvallaartarneranni pingaaruteqarpoq paasissallugu inuiaqatigiinni tunngavitsigut pingaaruteqarlutik naleqassutsivut oqallisigissallugit aamma piffissaqartariaqaratta.

Ataqatigiinneq inuiaqatigiit kalaallini nalinginnaasumik pingaaruteqarluni naleqartutut Kalaallit Nunaanni isigaarput. Nunani killerni amerlaqisuni, pingartumillu skandinaviami, imminuinniq eqqarsaatigisarneq oqallisaasoq Kalaallit Nunaanni ataqatigiinnerput ilaqtariinnerullu iluani sakkortuumik ataqatigiinnerput tullusimaarutiguarsimavarput.

Naleqartitat tamakku annertuumik pingaaruteqarput inuiaqatigiinni pisariaqartitavut ataatsimoorluta illersorniarlugit ataatsimut piginnaasavut pisariaqartikkatsigit. Ullutsinni inuk inoqatiniminut atanissamik pisariaqartitsisariaqanngilaq nammineerluni inuuniarnissaminut pisariaqartitani pissarsiarisinnaammagut. Kisiannili tamatta ilisimavarput inuiaqatigiinni tamat oqartussaaqataaneranni immitsinnut pisariaqartikkatta inuiaqatigiinni atugarissaarnissaq attatiinnarniarlugu. Taamaammallu aamma pingarluinnarpoq inuiaqatigiinni ataqatigiinnita attatiinnarnissaa.

Ataqatigiittutut misiginermut sunniuteqartartut soorunami aamma allarpassuupput. Nunatsinni kinguaariit kingulliunerusut inerikkiartornerminni tamarmik immikkut assigiinngeqisunik atugaqartarsimapput, tamannalu pissutigalugu aamma inuunermik paasinneriaaseqarsinnaasarlutik inoqatinillu isignerriaaseqarsinnaasarlutik.

Inuiaqatigiit ilaanni upperisarsiorneq naalakkersuinikkullu isummersorneq ataatsimuussuseqarnermut imaluunniit paarlattuanik avissaartuussimanermut aalajangiisuuulluinnartarput. Nunatsinni inuiaqatigiit naalakkersuinikkut patajaatsumik ingerlatsiffiusutut ilisimaneqarpugut, aamma nunatsinni naalakkersuinikkut isummersortarnerit ukiuni kingullerni sakkortusiartoraluartut, taava apequtini pingaaruteqarlunnartuni isumaqatigiissinnaasarpugut.

Inuiaqatigiit nutaanngoriartornerat ilutigalugu naleqassutsivut aamma nutaanngoriartortutut oqaatigineqarsinnaapput. Ataqatigiinneq siusinnerusukkut qaniginerpaasani taamaallaat nassaarisinnaasimasarput massakkut angalanissamut periarfissat qarasaasiatigullu tusagassiuit nutaat aqqutigalugit siammerternikuupput. Taamaalilluni kalaallit ileqqoralugu ataqatigiinnerat unammillerneqarpoq. Peqataanilli oqartoqarsinnaavoq ineriertorneq ilaqtariit akornanni ataqatigiittooqarnissaanik aamma periarfissiimmat, naak immitsinnut ungasikkaluarluta ilaallu nunani allani najugaqaraluartut.

Taamaammat inuit ataasiakkaat akornanni ataqtigiinneq aamma allanngorsimavoq, taamaakkaluartorli tamanna ilisimalluarparput. Tamanna tunngavigalugu ukiuni kingullerni sulinuit arlaqartut aallartinneqarsimapput kalaallit ataqtigiinnerannik ingerlatsiinnarlutillu sakkortusaasussat.

2009-mi juunimi Kalaallit Nunaanni Namminersorneq pillugu Inatsisip eqqunneqarnissaa kalaallit inuaat ataatsimoorlutik akuersissutigaat, taamatuttaarlu namminiilernissaq pillugu kissaateqarneq kalaallit inuaat ataatsimoorlutik aalajangertussaavaat. Uagut, inuaat kalaallit, Namminersorneq pillugu Inatsit aqqutigalugu kiisami akuerisaavugut, tamatumanilu ataatsimoortuunerput avammut uppernarsarparput. Namminersorneq pillugu Inatsisip aamma kalaallit ataatsimoortuunerat nukittorsarpaa kalaallit oqaasiisa pisortatigoortumik oqaasiunerisa akuerisaanerisigut.

Taamaammat Namminersorneq pillugu Inatsisip inuiatigiinni nutaamik nukissaqalernissaq periarfissippaa. Massakkut piffissanngorpoq ataatsimoorluta kivitseqatigiinnissatsinnut, soorlu Kattusseqatigiit Partiata oqariartuutaa naapertorlugu inuk “nunaminik” sulississaaq, kisiannili ataatsimoorluta “nunarput” aamma sulisissavarput.

Nunarsuatsinni killeqarfeerukkaluttuinnartutut pissuseqartumi inuiattut anguniakkanik nutaanik aalajangersaavugut. Ataatsimoorfingisinnasavut ataatsimullu iluaqtigisinnaasavut pingaartinnerusariaqarpavut, avissaartuuffiusinnaasut tunulliullugit.

Oqaatsit taakku oqaatigalugit pissanganartumik oqallittoqarnissaa qilanaaraara.